

主編◎林慶彰 賴明德

劉兆祐 張高評

汪文安《十一朝東華錄攬要二》

晚清四部叢刊

第一編

36

主編◎林慶彰 賴明德
劉兆祐 張高評

汪文安《十一朝東華錄攬要二》

晚清四部叢刊

第一編

36

常州大學圖書館
藏書章

國家圖書館出版品預行編目資料

晚清四部叢刊. 第一編 / 林慶彰等主編. --臺中市 : 文听閣圖書, 2010.11
冊 ; 公分

ISBN 978-986-85747-1-7 (全套:精裝)

1. 叢書 2.清代

082

99021531

ISBN 978-986-85747-1-7



《晚清四部叢刊》第一編 (全 120 冊) 16k 精裝

主 編： 林慶彰 賴明德 劉兆祐 張高評
副 主 編： 蔣秋華 邱德修 馮曉庭 王基倫
出版·發行： 文听閣圖書有限公司
地 址： 台中市西屯區(407)逢甲路 225 巷 9 號
電 話： (04)27067357
傳 真： (04)27067028
統 編： 27832175
印 刷： 百通科技股份有限公司
電 話： (02)86926066
初 版： 2010 年 11 月

ISBN : 978-986-85747-1-7

定 價：新台幣參拾陸萬元整

目次

十一朝東華錄攬要二……………汪文安

十一朝東華錄彙要

東華錄擊要卷十七

宜興汪文安敬錄

男翰章恭校

聖祖仁皇帝

辛巳康熙四十年春正月。給事中湯右曾疏言。臣昔在翰林。曾充三館纂修官。而在政
治典訓館最久。伏見皇上敬天法祖。勤政愛民。盛德大業。備具此書。內外大小臣
工。咸有天語叮嚀。提撕警覺。以至國家禮樂兵刑典章制度。下及民間日用飲食。纖
悉周祥。請勅刊頒行天下。又臣昔嘗分直內廷。幸獲仰窺御製文集。窮千聖之精微。
彙百家之體制。上闡道統。下該治法。盡善盡美。亙古未有。今儒臣校對。繕寫將竣。祈
並賜刊發。以慰四海想望。以垂萬世準則。疏下所司知之。禮部議覆。河道總督張
鵬翮奏。請加河神封號。得旨。著封爲顯佑通濟昭靈效順金龍四大王。二月己
未朔。上巡幸畿甸。啓鑿。辛酉。上閱視永定河。至清涼寺決口。甲戌。上閱
子牙河。丙子。閱柳岔口。直隸巡撫李光地奏。參王新命等。修河錢糧。並無著落。
命內閣學士法良等往察。至是覆奏。錢糧不清。王新命蒙混虧空。命拏赴吏刑工
三部。嚴加議處。庚辰。上還京師。三月壬寅。諭大學士等。督撫奏銷錢糧疏

內。因銀數有一兩不符。及四兩不符者。該部輒議駁回。事甚微細。必待往來申奏。然後改正。殊覺多事。嗣後錯誤十兩以內者。部內行文改正。不必議駁。先是吏科給事中馬士芳。疏參湖廣巡撫年遐齡。徇庇布政使任風厚。老病不入大計。至是。上諭大學士等曰。任風厚調來引見。其年尙未衰老。可以辦事。如爾諸臣。俱係年老。坐而辦事。必須老成練達者。方能得當。州縣官則不可。若道員以上。必以年長者爲佳。不惟此也。凡一省易一大吏。一方百姓。不能無累。外官惟以清廉爲要。郭琇居官清廉。而辦事和平。如任風厚。果係不堪。郭琇豈肯徇庇。任風厚仍赴原任。至言官參奏不實。若皆議處。未敢復言。馬士芳著免其申飭。夏四月己未。兵部議覆廣西巡撫彭鵬奏。粵西歷年。武科應試人少。前撫臣請暫行停止。今武生衆多。請於壬午科。仍開武科鄉試。從之。庚午。刑部等衙門議覆。王新命在永定河。監修誤工。浮冒銀一萬六千餘兩。擬斬監候。赫碩滋心口相違。行事乖張。應絞監候。白碩色不思剔除弊端。應革去佐領。枷號鞭責。從之。丁丑。上巡視永定河。啓鑾。乙酉。上還京師。五月。巡視西城御史張瑗疏言。西山碧雲寺後。有前明太監魏忠賢墓碑二座。碑後刻有孝官孝孫等六七十人姓名。並不填寫年號。使其造於故明之日。豈有顯遭

正法之逆璫。敢於僭橫。乃爾。若造於我朝定鼎之後。則不書昭代年號。尤屬狂悖不法。乞賜撲毀。得旨。魏忠賢碑墓。著交與該城御史官員。撲毀剗平。該部知道。給事中馬士芳。疏劾山東巡撫王國昌。於大計重典。濫薦歷城縣令管承寵。又徇庇溺職之長清縣崔錫榮。不行題參。上諭大學士等曰。朕聽政四十餘年。凡條奏之事。稍有私意。斷不能欺朕。馬士芳。特不喜漢軍居督撫之任。故將王國昌參奏。朕所知漢軍人數員。已盡置外任。果如張鵬翮李光地郭琇者。能有幾人。朕曾問李光地云。山東巡撫王國昌。雖無過人之才。但心地和平。地方尙受其益。果在地方安謐。卽百姓之福矣。尋國昌疏辨。部議管承寵爲該巡撫私人。並無實據。應免議。其溺職之崔錫榮。該撫不於大計題參。應降一級准抵。從之。六月庚辰。授宋儒邵雍後裔世襲五經博士。秋七月丁亥。領侍衛內大臣公費揚古。途間患病。上停鑾一日。親往視疾。賜御帳一。又命大臣侍衛等。時往視之。費揚古尋病篤。賜鞍馬三匹。散馬四匹。銀五千兩。蟒緞等物。遣內大臣侍衛護送還家。己亥。工部議覆御史張瑗奏。京畿墊道。大興宛平兩縣。每年原有工價銀一萬餘兩支銷。至五城所派夫役。並無分毫工食。乞將五城應墊之道。統歸兩縣經理。從之。上諭大學士等。御史杜之昂。魏壽

期所奏六本。俱極冗長。夫本章俱有定額。此六本何乃故爲逾格。凡言事期明晰。如將無用文章。闖入何益。今杜之昂欲將邵雍後裔。授爲博士。但數言可耳。若必將邵雍之賢。一一舉出。卽十疏豈能盡之。魏壽期所奏漢中府地方。民生本極富庶。自吳三桂叛後。戶口逃散。此言尤爲背謬。彼處自明朝末年。爲流寇張獻忠屠戮殆盡。自順治十七年。至康熙十一年。用兵始定。歷年無幾。則人民豈遽能生聚。所奏著發還。至魏壽期奏。凡州縣初到任後。祇許到省一次。謁見督撫。若不時往來。必致送禮。及勒取之弊。大約治道亦不在此。內而大學士九卿。外而督撫屬下之人。豈俱不相往來。若大臣無欲。則屬下以廉。豈關往來謁見之故也。八月癸亥。皇子允禛生。乙丑。上幸索岳爾濟山。諭大學士等。此山形勢崇隆。允稱名勝。嗣後此山禁止行圍。九月乙酉朔。予故領侍衛內大臣公費揚古祭葬。加祭三次。諡襄壯。厄魯特策妄阿喇布坦。遵旨解送噶爾丹女鍾齊海至京。命與噶爾丹之子。色卜騰巴爾珠爾同居。授色卜騰巴爾珠爾一等侍衛。以鍾齊海婚配二等侍衛沙克都爾。咸令得所。冬十月。湖南按察使員缺。大學士伊桑阿等。以九卿保舉。江南淮徐道施世綸入奏。上諭曰。施世綸朕深知之。其操守果廉。但遇事偏執。百姓與生員訟。彼必護

庇百姓。生員與職官訟。彼必庇護生員。夫處事惟求得中。豈可偏私。如施世綸者。委以錢穀之事。則相宜耳。十一月丁未。上謁陵啓鑾。十二月己巳。上還京師。廣東官軍。剿連州。獠人失利。命正黃旗漢軍都統嵩祝。偕副都統達爾占。侍郎傅繼祖。往會總督石琳。調廣西湖南兵進剿。卽授爲廣東將軍。上諭曰。獠人所居之山。通連廣東廣西湖南三省。林木叢密。山勢崇峻。恃此險僻。頑梗不馴。自宋明以來。卽在此三省擾害民生。爾等務體朕好生至意。不必遽行征剿。先宜曉示招撫。爾等到彼。卽以獠人山寨形勢。三省官兵進征之路。及立營之處。繪圖呈覽。如獠人歸順。止將殺害官兵之爲首者。正法可也。

壬午康熙四十一年春正月壬寅。詔修國子監。癸卯。諭大學士等曰。朕觀諸臣任科道時。多有敢言沽直聲。以得升遷者。及爲大僚。輒不敢言。問以小事。皆云不知。前後頓不相符。因顧起居注官等曰。朕言可詳記之。庚戌。上幸五臺山。啓鑾。二月辛酉。上駐蹕菩薩頂。嵩祝等師次連州。駐軍三江口。遂合三省官兵。分布要隘。繪圖以進。疏言。獠人爲數無多。棲身之地。亦未寬廣。所恃者。不過山險路狹耳。上諭曰。獠人就撫則已。否則於其居處要隘。立營圍之。不必勞兵力。而彼自窮迫。

也。嵩祝尋疏。臣等遵奉。皇上指示機宜。勸視八排山寨。卽於要地設立營壘。先遣人招撫連州界內。油嶺行祥橫坑三排。人先行薙髮。開報家口。荷負雞彘酒食。呈送行營。而連山界內之軍寮。馬箭。火燒坪。大掌嶺。四大排。並雞公背等。各小排。以次薙髮投誠。最後里八峒排。人將爲首殺害官兵之李貴。鄧二等九人擒獻。卽行正法示衆。遣兵察驗人口。共八千一百餘。安插事宜。責成提督料理。臣等撤兵。回京覆命。得旨嘉獎。乙丑。上回鑾。三月。壬午朔。上還宮。夏四月。癸酉。御史張瑗奏。本朝會典。宜刊刻頒行。從之。五月。禮部議覆。五經博士程衍祀。請給程子祭田。應不准行。上曰。程子大儒。祀典不可有缺。尋議每歲春秋。給銀四十兩奉祀。從之。丙午。傳大學士九卿翰林詹事科道官一百四十餘員。至保和殿。頒賜御書有差。諭曰。尋章摘句。華麗詞藻。非帝王之本務。朕四十餘年。惟日兢兢。未嘗晷刻稍釋。萬幾自警。有始無終之誚。念茲在茲也。政事稍懈。頗好書射。歷年以來。所積臨摹字幅。以賜卿等。庚戌。大學士等。以直隸巡撫李光地。摺奏修永定河石隄。進呈。上曰。朕令永定河修理石隄。特欲於此處試之。所費不過二十萬。卽已底績。今戶部之帑。現存五千萬。朕意欲於黃河。自徐州至清口兩岸。悉築石隄。度其費不過千萬。

若獲成功。則永遠無患。但運石稍難耳。馬齊奏曰。此誠一勞永逸之計。然必待 聖駕親臨。乃可定議。六月。御製訓飭士子文。頒發禮部。命勒石太學。御書道德仁義四字額。賜翰林院。德業仁義四字額。賜詹事府。都兪吁咈四字額。賜都察院。己未。上奉 皇太后避暑。啓鑾。山東巡撫王國昌。疏陳東省便民事宜。一倉穀。遵例存七糶三。於青黃不接時。減價平糶。秋收糶穀還倉。一德州倉米。支放各營兵糧。向係四季徵收。春夏農忙時。難以猝辦。應動司庫銀買米支放。其額徵米石。俟秋後徵收。一額徵班匠銀四千餘兩。均入地丁項下徵解。一魯藩舊基地。聽民耕種。輸租。卽於開墾之年升科。給印帖。俾爲恆業。下部議行。閏六月。辛丑。兵部議覆四川巡撫貝和諾奏。打箭爐木鴉一帶。歸順番民。一萬九千餘戶。應添設安撫使五員。副安撫使二員。土百戶四十五員。以專管轄。從之。增浙江鄉試中額十二名。照江南例。共八十三名。共增同考官三員。秋七月。丙子。增湖廣鄉試中額十三名。照江南例。共八十三名。八月。戊申。上奉 皇太后還京師。九月。特遣侍衛五格。賚御書耆年碩德匾額。及對幅。賜致仕大學士少傅王熙。并傳諭曰。卿歷官最久。自去歲告病在家。無日不念老臣也。近日九卿皆求匾額字對。想卿身雖在告。心未嘗一

時不在朝中。故特書以賜卿。其勉強餐食。輔以醫藥。慰朕不忘耆舊之至意。上諭大學士等曰。浙江布政使趙申喬。居官甚清。所有家人。僅十三人。並無幕客。辦事皆躬親。火耗分釐不肯取。其陞辭奏云。到任不做好官。請置重典。今觀其居官若此。真能踐其言矣。卽擢爲浙江巡撫。尋申喬抵任後。屢疏奏請築錢塘江口隄。修葺禹。及增浙江省鄉試中額。從之。先是議遷五開衛署於平屯。俾黎平府專城而治。湖南布政司施世綸牒稱。五開衛界黔粵。控蠻彝。實爲辰沅靖之藩籬。明宣德年間。黔省黎平府。數有苗患。爰僦衛城建府署。國朝因之。自康熙二十七年。府衛官弁不和。始有遷衛之議。平屯僻處一隅。不惟建造無資。且孤立堪虞。若官軍兩遷。一旦棄田園。壞廬舍。必致流離失所。若僅遷衛署。貢賦出納。遙轄最難。矧自明迄今。府衛同城。軍兵相安無事。請仍舊便。議久不決。至是總督喻成龍。巡撫趙申喬會疏。特旨允。禮部議。監生莊令輿。俞長策。試卷作五經文字。與例不合。上曰。所作五經文字。若俱浮泛不切。自不當取中。若能切題旨。文理明順。一日書寫二萬餘字。實爲難得。莊令輿。俞長策。著俱授爲舉人。嗣後不必禁止。作何定例。著議奏。兵部議覆。湖廣鎮筸生員李豐等。叩關稱鎮筸紅苗。肆行虜掠殺人。地方官不究不報。謹進輿圖。

一紙。並被擄之地。開列進呈。給事中宋駿業。疏劾湖廣總督郭琇。巡撫金璽。提督林本植。總兵雷如等曰。苗犛性本獷悍。使之畏懷。庶不致擾害良民。此封疆大臣專責。近聞鎮守士民叩關一疏。言紅苗搶奪恣肆。蓋由督撫提鎮。平時不能嚴飭屬員。加意撫輯。及事發。又不卽奏請剿撫。種種玩愒。已盡在聖明洞鑒之中。卽特遣大臣到彼。相度機宜。彼處官吏。各懷瞻顧。上司之意。必多方容隱。眞情豈能盡得。況郭琇。向騫虛聲。近益衰廢。加以林本植之昏耄。金璽雷如之庸懦。惟怯。養癰成患。視民爲兒戲。置封疆於度外。以致釀成刁悍。祈立賜罷斥。另選賢能代任。庶不致回護。而剿撫得協機宜。上命侍郎傅繼祖。甘國樞。浙江巡撫趙中喬。馳驛往湖廣。詳察具奏。尋覆奏紅苗搶掠狀俱實。郭琇。金璽。林本植。雷如。並坐諱匿黜罷。湯右曾奏請鑄重錢。作銀一兩。鑄輕錢。作銀七錢。並聽行使。積久大錢流通。小錢自不行矣。部議從之。癸酉。上巡視南河。啓鑾。冬十月。乙酉。京師地微震。九卿議。嗣後鄉會試。作五經文字者。應額外取中三名。草稿不全者。免其貼出。二場於論表外。添詔誥各一道。癸卯。上還京師。賜山東巡撫王國昌。御書法理寬平。清慎勤二額。及表裏常交正。動靜自弗違聯。上諭曰。朕因闕河南巡。今以皇太子允礽患病。應卽回鑾。

明歲再閱視河工。十一月乙卯。免雲南貴州四川廣西四省。四十三年錢糧。悉行蠲免。免安徽省及陝西西河一帶。四十二年地丁錢糧。皇太子允礽病愈。還京。十二月。諸王大臣士民等。以皇上五旬萬壽。請上尊號。不許。

癸未康熙四十二年春正月壬子。諸王貝勒貝子公文武諸臣奏。今年三月十八日。

皇上萬壽節。正值五旬大慶。茲聖駕南巡。請預行慶賀禮。恭進鞍馬緞匹等物。上諭曰。爾等如此進獻。在外督撫必效之。朕必不受。朕素嗜文學。諸臣有以詩文獻者。當留覽。既而諸臣恭進慶祝萬壽屏。復以屏文繕寫冊頁進呈。得旨留冊頁。卻屏。

十六日壬戌。上巡視南河。啓鑾。庚午。上過濟南府。幸巡撫署中。觀珍珠泉。

御書三渡齊河卽事詩。令懸署門。示臣民。出觀趵突泉。御書源清流潔額。懸泉上。潤物額。懸珍珠泉。學宗洙泗額。懸省書院。壬申。上登泰山。駐蹕泰安州。免經過地方。四十一年未完錢糧。四川巡撫貝和諾疏言。各省教職。每學二員。獨川省有五十七學。各設一員。請於威及等州。敘州府。會川等衛。添設訓導一。溫江等縣。添設教諭一。九姓司學。添設教授一。從之。二月。上駐蹕長清縣界首鋪。是夜大風。南村失火。延燒民舍。侍衛海青等。率衆撲滅之。翌日。上諭巡撫王國昌。率司道察火燬。

房屋。居民人數。賜銀散給。丁丑。命運漕米四萬石。賑濟甯兗州。是日。上由宿遷縣五花橋。渡中河。遍閱隄工。至宿遷縣。渡黃河。戊寅。上徧閱徐家灣等隄。祥符等閘。復細閱新修河口。登舟。徧閱隄工。至烟墩登岸。己卯。上自桃源縣登舟。徧視河隄。御舟入清口。泊天妃閘。壬午。御舟過邵伯更樓。駐蹕揚州府城內。甲申。御舟渡江。登金山江天寺。書動靜萬古額。懸寺中。丙戌。駐蹕蘇州府城內。戊子。登舟。庚寅。駐蹕杭州府城內。閱駐防官兵射。癸巳。上回鑾。遣領侍衛內大臣阿靈阿等。閱錢塘江隄。乙未。登陸。駐蘇州。戊戌。自蘇州登舟啓行。辛丑。自京口。由陸路幸江甯府。駐蹕城內。壬寅。遣大學士馬齊。祭明太祖陵。癸卯。自江甯回鑾。至鎮江避風館登舟。泊金山寺。三月。戊申。上徧閱高家堰翟家壩隄工。己酉。上閱黃河南岸龍窩煙墩等隄。復渡黃河。閱九里岡等隄。庚申。上還京師。四川巡撫貝勒諾疏言。前撫臣于養志題。明松潘小河疊溪。收捐米穀。分貯備用。自三十八年迄今。松潘捐一千七百餘石。其小河疊溪。以道路險峻。輸運維艱。罕赴捐納。請停止收貯。從之。癸亥。以淮黃告成。頒詔天下。恩款三十八條。軍民年七十以下者。免一子徭役。八十以下者。與絹一疋。綿一斤。米一石。肉十斤。九十